



# Xalq so'zi

O'zbekiston —  
kelajagi  
buyuk  
davlat

2024-YIL — YOSHLAR VA BIZNESNI QO'LLAB-QUVVATLASH YILI

1991-yil 1-yanvardan chiqa boshlagan • WWW.XS.UZ • E-mail: Info@xs.uz • 2024 yil 11-oktabr, № 208 (8831)

Juma Saytimizga o'tish uchun QR-kodni telefoningiz orqali skaner qiling.



## STANDARTLASHTIRISH SOHASIDA QO'SHIMCHA VAZIFALAR

**Prezident Shavkat Mirziyoyev 10-oktabr kuni texnik jihatdan tartibga solish sohasidagi ishlar va rejalar bilan tanishdi.**

Mamlakatimizda ishlab chiqarish va eksport salohiyatini oshirish bo'yicha katta marralar belgilangan. Bunda texnik jihatdan tartibga solish, standartlashtirish va metrologiya masalalari muhim ahamiyatga ega. Shu bois O'zbekiston Respublikasi Prezidentining joriy yil 27-fevraldagi Farmoniga asosan sohada davlat boshqaruvi takomillashtirildi hamda yangi vazifalar qo'yildi.

Sonngi yillarda 12 mingta standart tasdiqlangan edi. Yil boshidan buyon yana 1 ming 40 ta xalqaro standart qabul qilindi. Mahsulot xavfsizligi va sifatini ta'minlash maqsadida 29 ta texnik reglament ishlab chiqildi. Bular sanoat korxonalarini va tadbirkorlarga yetkazilib, sertifikatlar olishiga ko'maklashilyapti.

Mutasaddirlar sohada qilingan ishlar, yil yakunigacha va keyingi yilga mo'ljallangan rejalar bo'yicha axborot berdi.

Davlatimiz rahbari tashqi bozorlarga chiqish uchun samarali texnik tartibga solish tizimi shartligini ta'kidlab, qo'shimcha vazifalarni belgilab berdi.

Bugungi kunda yurtimizdagi 269 ta laboratoriyadan atigi 64 tasida o'tkazilgan sinovlar xalqaro darajada tan olinadi. Oqibatda tadbirkorlar mahsulotlarini eksportga olib chiqishda qo'shimcha sinovlar o'tkazishga majbur bo'lmoqda.

Shu bois xalqaro tan olinadigan laboratoriyalarni ko'paytirish, elektr texnikasi, qurilish materiallari, mashinasozlik kabi sohalarda 10 ta yangi laboratoriya tashkil qilish zarurligi aytiladi.

O'zbekiston Jahon savdo tashkilotiga a'zo bo'lish yo'lidan bormoqda. Texnik tartibga solish sohasidagi qonunchilikni ushbu tashkilot talablariga moslashtirish muhimligi ta'kidlandi.

Bu yil 340 ta milliy standart, 2025-yil yakunigacha yana 38 ta reglament ishlab chiqiladi. 28 ta texnik qo'mita, laboratoriyalar faoliyatini raqamlashtirish ham muhim. Buning uchun "Texnik tartibga solish" elektron platformasi ishga tushiriladi.

Sohada sifat va samarani ta'minlash uchun zamonaviy bilim va ko'nikmalarga ega, xalqaro standartlar asosida ishlaydigan mutaxassislar kerak. Shu bois sohada kadrlar tayyorlash tizimini takomillashtirish bo'yicha topshiriq berildi.

O'ZA.

## O'ZBEKISTON PREZIDENTI TURKMANISTONGA TASHRIF BUYURDI

**O'zbekiston Respublikasi Prezidenti Shavkat Mirziyoyev 10-oktabr kuni amaliy tashrif bilan Ashxobod shahriga keldi.**

Davlatimiz rahbarini aeroportda Turkmaniston Vazirlar Mahkamasi Raisining o'rinbosari Tangirgul Ataxallyev va boshqa rasmiy shaxslar kutib oldi.

Asosiy tadbirlar 11-oktabr kuni bo'lib o'tadi. O'zbekiston yetakchisi turkman shoiri va mutafakkiri Maxtumquli Turkmanistonga tashrif buyurdi.

Firoqiy tavalludining 300-yilligiga bag'ishlangan "Zamon va sivilizatsiyalarning o'zaro bog'liqligi — tinchlik va taraqqiyot asosi" xalqaro forumining yalpi majlisida nutq so'zlaydi.

Davlatimiz rahbari tadbir doirasida ikki tomonlama uchrashuvlar ham o'tkazadi.

O'ZA.

O'zbekiston — Turkmaniston:

## AZALIY DO'STLIK VA YAXSHI QO'SHNIHLIK RISHTALARIGA SODIQLIK TIMSOLI

*O'zbekiston Prezidenti Shavkat Mirziyoyev atoqli turkman mutafakkiri, Sharq mumtoz adabiyotining yetuk namoyandasi, shoir va ma'rifatparvar Maxtumquli Firoqiy tavalludining 300-yilligiga bag'ishlangan tantanali tadbirlarda ishtirok etish uchun 10-oktabr kuni Turkmanistonga tashrif buyurdi.*

### Biz va jahon

Boshlangan tashrif mamlakatlarimiz chuqur tarixiy ildizlarga ega bo'lgan yaxshi qo'shniqlik, o'zaro manfaatli hamkorlik va madaniyatlararo muloqotni mustahkamlash siyosatiga sodiqligini yana bir bor tasdiqlaydi.

O'zbekiston va Turkmaniston mintaqadagi yaqin qo'shnilar va vaqt sinovidan o'tgan hamkorlardir. Davlatlarimiz mustaqillikning dastlabki kunlaridan boshlab yaxshi qo'shniqlik, o'zaro hurmat va tenglik tamoyillariga asoslangan samarali siyosiy muloqotni yo'lga qo'yish orqali hamkorlikni faollashtirish yo'lini belgilab oldi.

Turkmaniston O'zbekistonning Markaziy Osiyoda o'zaro manfaatli

hamkorlik hududini yaratish, mintaqaning xalqaro maydondagi roli va ahamiyatini oshirishga qaratilgan zamonaviy ochiq, konstruktiv tashqi siyosatini har tomonlama qo'llab-quvvatlaydi. Mintaqaviy va xalqaro ahamiyatga molik masalalar bo'yicha ikki davlatning nuqtayi nazarini va pozitsiyalarini mos keladi yoki o'xshashdir.

Ikki davlat rahbarlarining siyosiy irodasi tufayli sonngi yillarda davlatlararo munosabatlar sifat jihatdan yangi bosqichga ko'tarildi.

2017-yil ikki davlat o'rtasidagi aloqalarni rivojlantirishda tarixiy palla bo'ldi. O'zbekiston Prezidentining

Turkmanistonga uchta tashrifi, jumladan, 6-7-mart kunlari davlat tashrifi amalga oshirildi. Bu davlatimiz rahbarining oliy lavozimga saylanganidan keyingi ilk rasmiy xorijiy safaridir. Ushbu chuqur ramziy qadam ikki tomonlama munosabatlarni yangi bosqichga olib chiqdi hamda ularga dinamik va keng qamrovli tus berdi.

2022-yilda ikki davlat rahbarlari o'zaro rasmiy tashriflarni, 2023-yilda esa ko'p tomonlama shakllarda ishtirok etish doirasida amaliy tashriflar bilan almashdilar. Ushbu uchrashuvlar, shubhasiz, Markaziy Osiyodagi umumiy mintaqamizda uzoq muddatli barqaror sheriklik, tinchlik va yaxshi qo'shniqlikni rivojlantirish hamda kengaytirishda muhim ahamiyatga ega bo'ldi.

Yuqori darajadagi hamkorlik ham izchil rivoj topmoqda. Parlamentlararo va idoralararo aloqalar ham ikki tomonlama, ham

ko'p tomonlama shakllarda mustahkamlanib borayotir. Bugungi kunda 314 ta ikki tomonlama, jumladan, davlatlararo, hukumatlararo va idoralararo hujjatlardan iborat bo'lgan huquqiy baza shakllangan.

Shuningdek, Turkmaniston O'zbekistonning muhim savdo sheriklaridan biri hisoblanadi. 2023-yil yakuniga ko'ra, o'zaro tovar ayirboshlash hajmi 1 milliard dollardan oshdi, joriy yilning yanvar — avgust oylarida ushbu ko'rsatkich qariyb 520 million dollarga yetdi.

Mintaqalararo va transchegaraviy hamkorlik ikki tomonlama sheriklikning muhim yo'nalishi hisoblanadi. Buxoro va Xorazm viloyatlari hamda Turkmanistonning Lebap va Dashoguz viloyatlari o'rtasida samarali aloqalar o'rnatildi. Tomonlar joriy yilning noyabr oyida Turkmanobod shahrida ikkinchi Hududlararo forumni o'tkazishga tayyorgarlik ko'rmoqda.

## SAYLOV — 2024

**O'zbekiston Respublikasi Oliy Majlisi Qonunchilik palatasi, xalq deputatlari viloyat, tuman va shahar Kengashlariga saylovlar bo'yicha saylov kampaniyasi doirasida siyosiy partiyalarning saylovoldi tashviqoti davom etmoqda. Bugungi sonda O'zbekiston Xalq demokratik partiyasi nomidan "Ijtimoiy davlatga samarali ijtimoiy siyosat orqali erishamiz!" sarlavhali maqola e'lon qilinmoqda.**

3-sahifaga qarang.

## Sammit

**Raqamli dunyoda kiberxavfsizlikning ahamiyati:**

## YECHIMLAR, TAHDIDLAR VA HAMKORLIK

*Poytaxtimizda Kiberxavfsizlik markazi va "Dialogue Events" kompaniyasi hamkorligida "Kiberxavfsizlik sammiti — Markaziy Yevrosiyo, CSS — 2024" II xalqaro kiberxavfsizlik sammiti tashkil etildi.*

O'ttizdan ortiq davlatlardan oltmishga yaqin kompaniyalar, yuzdan ziyod delegatlar, shuningdek, Janubiy Koreya, Ozarbayjon, Turkiya, Gruzija, Turkmaniston, Tojikiston, Qozog'iston kabi o'ndan ortiq xorijiy mamlakatlar tartibga soluvchi organlari hamda xalqaro tashkilotlar — Xalqaro elektr-alloqa ittifoqi, "FIRST", "SABABA" vakillari qatnashgan ushbu nufuzli sammitda O'zbekistonning raqamli infratuzilmasini mustahkamlash, xususan, kiberxavfsizlik bo'yicha amalga oshirilayotgan islohotlar va yutuqlar haqida ma'lumot berildi.

Ta'kidlanganidek, yurtimizda davlat idoralari raqamlashtirilib, aholi uchun onlayn xizmatlar soni kengaytirildi. Kiberxavfsizlik, ya'ni xavf-xatarlarning oldini olish bo'yicha ham tizimli ishlar olib borilmoqda.

Ikki kun davom etgan tadbirida malakali ekspertlar sohaning hozirgi holati hamda undagi muammolarning samarali yechimi haqida fikr yuritildi.

Mintaqaviy kiberhamjamiyat uchun o'zaro tajriba almashish, zamonaviy yechimlarni

namoyish etish, muhimi, o'zaro manfaatli asosda yangi imkoniyatlarni ochish uchun yuqori darajadagi xalqaro interfaol platforma yaratishga qaratilgan ushbu tadbirida yalpi muhokamalar, taqdimot sessiyalari, ko'rgazma va qator qiziqarli tarmoq tadbirlari o'tkazildi, bu qatnashchilarga texnologiyalar hamda yechimlarni samarali va foydali tarzda namoyish etish, yangi biznes aloqalarini yaratish imkonini berdi.

Konferensiyaning umumiy mavzusi raqamli dunyoda kiberxavfsizlikning ahamiyati, mavjud tahdidlar, ularni bartaraf etish va sohani yanada rivojlantirishda hamkorlik, muhim infratuzilma va biznes aktivlarini himoya qilish masalalariga qaratildi. Anjumanda oltmishga yaqin ma'ruzachilar o'z kompaniyalari va takliflarini taqdim etdi.

Tadbir doirasida "Cyberkent 2.0" hamda "CTF" musobaqalariga ham start berildi. "Cyberkent 2.0" respublika musobaqasi doirasida "Workshop" seminar-treningi ham tashkil etildi.

"Xalq so'zi".

## Oliy Majlis Senatida

### "QIZLARJON" BILAN MULOQOT

*Oliy Majlis Senatida oliy ta'lim muassasalari "Qizlarjon" klubi raislari va xotin-qizlar maslahat kengashi raislari bilan uchrashuv bo'lib o'tdi.*



Unda senatorlar tomonidan keyingi yillarda mamlakatimizda amalga oshirilayotgan keng ko'lami islohotlar mazmun-mohiyati yuzasidan ma'lumot berildi.

Shuningdek, yurtimizda xotin-qizlarni har tomonlama qo'llab-quvvatlash, ta'lim olishlari uchun keng

imkoniyatlar yaratish, kasb-hunarga o'rgatish va ularning bandligini ta'minlash hamda jamiyat hayotidagi ijtimoiy-siyosiy faolligini oshirish, turli sohalarida o'z qobiliyat va imkoniyatlarini ro'yobga chiqarishi uchun shart-sharoitlar yaratish ustuvor vazifaga aylangan alohida urg'ulandi.



## Qonunchilik palatasi qo'mitalarida

### YO'L HARAKATIGA OID AYRIM QOIDABUZARLIK UCHUN JAVOBGARLIK BELGILANMOQDA

*Oliy Majlis Qonunchilik palatasining Korruptsiyaga qarshi kurashish va sud-huquq masalalari qo'mitasi tomonidan yo'llarda harakat ishtirokchilari xavfsizligini ta'minlash va ularning erkin harakatlanishiga sharoit yaratishga qaratilgan qonun loyihasi dastlabki tarzda ko'rib chiqildi.*

Mazkur qonun loyihasi bilan Ma'muriy javobgarlik to'g'risidagi kodeksning ayrim moddalariga o'zgartirish va qo'shimchalar kiritilmoqda. Ya'ni haydovchilarning transport vositalarini trotuardan, piyodalar va velosiped yo'laklaridan, yashil hudud maydonlaridan yuruzgishi, shuningdek, yo'l harakatiga qasddan, jumladan, noqonuniy to'siqlar o'rnatish yoki to'sib qo'yish bilan xalal berish, yo'l



harakati ishtirokchilari harakatiga to'sinlik qiluvchi boshqa qujilmalarni o'rnatish bilan bog'liq qoidabuzarliklar uchun javobgarlik belgilanmoqda.

Qonun loyihasi mas'ul qo'mita tomonidan Qonunchilik palatasining navbatdagi majlisi kun tartibiga kiritish uchun tayyorlanmoqda.

(Davomi 2-betda).



## ABADIYATGA DAXLDOR MEROS

*Samarqand shahrida "Mirzo Ulug'bek: buyuk qomusiy olim va mashhur davlat arbobi" mavzuida xalqaro konferensiya tashkil etildi.*

### Konferensiya

Ushbu anjuman davlatimiz rahbarining joriy yil 12-sentabrdagi "Buyuk qomusiy olim va mashhur davlat arbobi Mirzo Ulug'bek tavalludining 630-yilligini keng nishonlash to'g'risida"gi qaroriga muvofiq Oliy ta'lim, fan va innovatsiyalar vazirligi, O'zbekiston Fanlar akademiyasi va Samarqand viloyati hokimligi tomonidan o'tkazilmoqda. Unda qator xalqaro tashkilotlar, dunyoga mashhur nufuzli universitetlar vakillari, taniqli astronom olimlar ishtirok etyapti.

Tadbir qatnashchilari dastlab Mirzo Ulug'bek rasadxonasida bo'lib ulug' alloma haykali poyiga gullar qo'ydi.

Sharof Rashidov nomidagi Samarqand davlat universitetida konferensiyaning ochilish marosimi tashkillashtirildi.



**Respublikamiz bo'ylab kutubxona foydalanuvchilarining eng ko'p toifasini 15 — 24 yoshdagi yoshlar tashkil etadi, ularning umumiy soni 6,2 mln. kishiga yetadi.**

## KUTUBXONALAR VA TA'LIM SIFATI

Mamlakatimizda ta'lim sohasini rivojlantirishga katta e'tibor qaratilmoqda. Ta'limga davlat xarajatlari 2019-yildagi YAIMning 5,6 foizidan 2021-yilda **6,2 foizga** oshdi.

2023/2024 o'quv yili boshida O'zbekistondagi umumta'lim maktablarida o'qituvchilar soni **548 ming** nafarni tashkil qildi. Bu ko'rsatkich 4 yil ichida **61 ming** kishiga ko'paydi.

O'zbekiston birinchi marta PIRLSda ishtirok etgan bo'lib, tadqiqotda yurtimizdagi **180** maktabdan **5 ming 948** nafar o'quvchi, shuningdek, ularning ota-onalari, maktab direktorlari va sinf rahbarlari qamrab olindi.

Manba: Iqtisodiy tadqiqotlar va islohotlar markazi.





